

Inatsisartunut qinersinermi inatsit tunngaviatigut, inatsisartullu agguataarneranut kisitseriaaseq, inatsisartut amerlassusaat kiisalu qanoq nunatsinni siammasissumik inatsisartuni ilaasortaataqarneq, qanga kommuunit kattutinngikkallarmata kredsime qinikkat 17-it ilaasortanngorsinnaanngortillugit aamma illoqarfiit inuttussusii najoqqutaralugit ilaasortaqalerlutik apeqquteqaat aallaavigalugu oqallisissiamik siunnersuut.

(Inatsisartuni ilaasortaq, Jens Napätök', Naleraq)

Akissuteqaat

(Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoq)

Naalakkersuisut siunnersuuteqartoq Jens Napätök', Naleraq, oqallisissiatut siunnersuut manna saqqummiunneranut qujassuteqarput.

Inatsisartut nunatsinni inatsisiliortuupput, nuna tamakkerlugu naalakkersuineq ilusilersorneqarluni aamma inuiaqatigiit tamakkerlugit sinniisuuffigineqarlutik. Nunap tamarmi siuariartornissaa anguniagaraarput. Naalakkersuisut pingaartippaat, qinersisartut tamarmik naligiittussaanerit, taamaattumik taasineq ataaseq naligiittumik atuutissaaq nunami sumiluunniit najugaqaraluaanni. Taamaattumik Naalakkersuisut isumaqarput, Kalaallit Nunaat qinersiviusariaqartoq ataaseq.

Inatsisartunut qinersinermi periaaseq maannakkut atuuttoq ima aqqissugaavoq, Kalaallit Nunaat tamarmi ataatsit qinersiviulluni, taamaalilluni qinersisartut partiinik tamanik taasisinnaapput, aamma kissaatigigaanni, qinigassanngortittunut aalajangersimasunut inuttut taasisinnaallutik. Taamatut taasinermit kiffaanngissuseqarneq attanniarlugu Naalakkersuisut kissateqarput.

Qinersinermi ilaasortaaffiit agguataarnissaannut assigiinngitsorpasuarfik periuseqarpoq. Periutsit tamarmik iluaqutissartaqarput ajoqutissartaqarlutillu. Inatsisartunut ilaasortaaffiit 31-t d'Hondtip periusia atorlugu agguanneqartarput, taamaalilluni qinersisartut amerlassusaata aamma ilaasortaaffiit agguataarnerisa amerlassusaata akornanni naapertuuttumik inissisimaneq qulakkeerneqarluni.

Europami inatsisartuni innuttaasut 100.000-t inorlugit amerlassuseqartuni, inatsisartunut ilaasortat agguaqatigiissinnerat 32-t missaanniippoq. Naalakkersuisut tulluurtutut isigaat Inatsisartut 31-nik ilaasortaqarmata.

Naggataatigut Naalakkersuisut kissateqarput tikkuassallugu, qinersisarnermi inatsit kingullermik taamaallaat ukiut sisamat qaangiummata iluarsanneqarpoq, akuersissutigineqarmallu 21-t tapersersuillutik itigartitsisoqarnanilu. Naalakkersuisut isumaqarput qinersisarnermut inatsit annertuumik allanngortinnissaa pisariaqanngitsoq, kisianni tunngaviit pillugit tunngaviusumik oqallinnissaq tikilluaqqullugu.

Taamatut oqaaseqarlunga Naalakkersuisut oqallinnissamat sunniuteqarluartumut qilanaarput.